



ATASSUT INATSIARTUNI

ATASSUT

UKA 2013/105-1

Siverth K. Heilmann

15.10.13

Siunnersuut uunga: Suliniutini angisuuni illulioertiternernik sanaartornernillu suliasat pillugit Inatsisartut inatsisaat nr. 25, 18. december 2012-imeersup allanngortinnissaa pillugu Inatsisartut inatsisaat nr. xx, yy 2013-imeersoq (suliniutinut angisuunut inatsit)
(Inuussutissarsiornermut Aatsitassaqaqarnermullu Naalakkersuisoq)

Suliniutinut angisuunut inatsisip ilusilersorneqaqarnernat atatillugu aammalumi inatsisip atuutsinneqalernerata kinguneratigut oqallinnerit annertuut nunatsinni nunattalu avataani ingerlanneqartut aallaavigalugit erseqqissaateqarnissamik pisariaqartitsisoqarnera aallaavigalugu Naalakkersuisut siunnersuummik matuminnga saqqummiussinerannut ATASSUT-mit akuersaartumik imaattumik oqaaseqaateqassaagut:

Nunatta suliffissuarujussuaqarfinngornissaa aatsitassarsiorfinngornissaalu ATASSUT-mit tamakkiisumik tapersersugaraarput, taamaammallu inatsisitigut sinaakkutassat naammassineqaleraluttuarnerat assut iluarisimaarparput neriulluinnarpugullu inatsisitigut piunasaqaataalersussat annertuumik suliniuteqarniartunut akimmisaarutitut atorneqarani sakkussatsialattut atorneqarumaassasoq.

Taamatut neriuteqarnitsinnut pissutaavoq nalinginnaasumik sulisitsisut sulisuisalu akornanni sulinermi atugassarissat, akissarsianut tunngasut il.il. naalakkersuinikkut akuliuffigineqartussaannngitsutut ATASSUT-mit isigigatsigit, illuatungeriimmi namminneq aaqqitassarimmatigit.

Taamaattorli ataqqivarput nunatsinni sulisitsisut sulisartullu annerpaamik illersorneqarnissartik aammalu salliutinneqarnissartik tamaviaarutigimmassuk, neriuppugullu aamma taakku naammagisimaagaannik inatsit manna naammassineqartoq.



ATASSUT INATSISARTUNI

Nunatta suliffissuarujussuaqarfittut aammalu aatsitassarsiorfissuartut ingerlatsivinngornissaa inuiaqatigiinnut uagutsinnut matunik nutaanik ammaassiffiusussaavoq, tamakkulu piviusunnngortitilerpata qularutissaanngitsumik inuiaqatigiit aningaasarsiornikkut iluaqutissarsiffingaaassavagut.

Atortut assartugassallu allat eqqarsaatigalugit ATASSUT-mit maluginiarparput tusarniaanermi akissutit ilaanni atortussat angallanneqarnerannut atatillugu Royal Arctic Line A/S isumalluutigineqassasoq kissaatigineqarsimasoq, taamaattorli Naalakkersuisut tikkuarpaat RAL nunat tamalaat imartaani angallassinissamik misilittagaqannginnera aammalu taamak annertutigisumik angallassissalluni misilittagaqannginnera immiini killiliisoq.

Taamaassinnaavoq, kisianni aamma misilittagarinngisat misilittagarilinngikkaanni tunniussaqaqataasinnaaneq killeqartinneqassaaq, taamaammat ATASSUT-mit neriuppugut nunatsinni suliffeqarfiit annerit minnerillu tamarmik aammalumi assartugassanik ilaasunillu assartuussisartut nunatsinniittut atorluarniarneqarumaartut.

Suliniutinut angisuunut inatsimmik manna erseqqissaataanerummat annertunerusumik oqaaseqaateqanngikkaluarluta naggataatigut periarfissaq iluatsillugu ATASSUT-mit kissaatigissavarput suliniutit annertuut pillugit suliat sumut killinnerannik erseqqissaateqalaaqullugit.

Taamatut oqaaseqarluta erseqqissaatit matumani pineqartut sukumiisumik misissorneqarsinnaaqullugit ATASSUT-mit inassutigissavarput siunnersuut aappassaaneerneqartinnagu Inatsisartut Inuussutissarsiornermut Ataatsimiititaliaannut suliassanngortinneqassasoq.